

Gronda renconuschientscha per ils «Ysmeischters»

L'Uniun da scursalets Trun (UDS Trun) ei vegnida fundada la stad avon 60 onns e dapi gl' unviern 1962/1963 dat ei era la plazza da glatsch naturala a Pustget. L'jamna vargada ei quella vegnida elegida en in «voting» dil Blick sco la patinera la pli biala dalla Svizra. Ina gronda renconuschientscha per la lavur dils «Ysmeischters».

SUSI ROTHMUND/FMR

Per la concorrenza dil Blick han lecturas e lecturs saviu proponer lur piazzas da glatsch preferidas e la fin finala han ei saviu dar lur vusch a diesch piazzas dall'entira Svizra. Denter auter era alla piazza da glatsch natural a Brienz el cantun Berna, allas piazzas da glatsch artificial Ochsenbühl ad Arosa ni Dolder a Turitg e perfin la patinera Ice Magic dad Interlaken el cantun Berna ei stada en elecziun. La medaglia d'aur ha la piazza da glatsch dall'UDS Trun fatg e quei cun varga 7300 vuschs avon la patinera dil casti a Grüningen el cantun Turitg che ha survegniu 6000 vuschs.

Plascher e cumpliments ein la pagaglia

Dapi ch'ei dat la piazza da glatsch a Trun dat ei era la squadra dils «Ysmeischters» – pia da quels che fan e tgiran il glatsch. Ina lavur intensiva ed ei drova propi idealists per ch'ei gartegi onn per onn, dapi 60 onns. Avon varga diesch onns ha Clau Giger surpriu il tgamun dalla squadra



La scola da patinar e la grupa da juniors s'auda tier l'Uniun da scursalets Trun.

FOTO MAD

dils meisters da far glatsch ed el fa quei cun tgerp ed olma. Sco gia auters onns ha el era quest unviern impundiu in'jamna da sias vacanzas per preparar la piazza da glatsch da 60 sin 30 meters. Tschien uras han el e ses collegas passantau cun sprizzar, splanar, better ora neiv ed aua. Per Clau Giger eis ei ina sfida da preparar in bien glatsch pils patinaders, per quels che tilan rudialas, pils commembers dall'UDS Trun, pils affons dalla scola da patinar e pils juniors che dattan hockey sin glatsch ed el puntuescha: «Igl ei tuttavia buca mo miu meret sch'il glatsch ei buns, quei drova igl engaschi da mintga singul da nies team. Che nus essan vegni sigl empem plaz dalla concorrenza dil Blick fa secapescha grond plascher ed ei ina biala renconuschientscha per tut nosa lavur voluntaria.»

Seplamein bellezza

Mo tgei motivescha da passentar ton temps cun preparar il glatsch e quei beinenqualga tier temperaturas d'entochen minus 18 grads? «Jeu hai bugen il freid, sesentel immens bein giu cheu e gaudel dad ir cun scursalets. Igl ei seplamein bellezza dad esser cheu la sera e la

notg, da sprizzar il glatsch ella ferdaglia cun l'illuminaziun, il ruaus...ah, quei san ins nuota propi descriver. Igl ei empau sco da tgiran in pop ed il bi ei da saver porscher alla gliud ina biala piazza e veser co ei han plascher. Nus survegnin era biars cumpliments da quels che van cun patinas e quei ei nosa pagaglia», declara Clau Giger ch'ei da mistregn architect. La pissiun pil glatsch ha tschaffau el gia duront sia affonza el vitg da Surrein. Sper casa paterna preparava el igl unviern ina piazza da glatsch da 7 sin 14 meters cun bandas per dar hockey culs amitgs. «La neiv schubergia-vel jeu naven cun in segapastget», seregorda el riend. L'infrastructura dalla piazza da glatsch a Trun ei secapescha bia pli moderna e culs onns adina puspei vegnida actualisada.

Idealists

Senza idealists e grond engaschi dess ei daditg buca pli la piazza da glatsch a Trun. Ein gie clubs da hockey da tradiziun sco quels da Domat, Glion, Panaduz, Val Müstair ed auters svani. In dils idealists ils pli incarnai dall'UDS Trun – che vegn presidiada da Rafael Bearth –

ei per franc Silvio Albin. Igl um da 70 onns sa aunc seregurdar dall'entschatta avon 60 onns. Igl empem vegnevi la patinera preparada sper la hetta da sittar, pér enzacons onns pli tard hagi la vischnaunca mess a disposiziun il plaz sper la piazza da ballapei. Ei mavien aunc cun scursalets da strubegiar vid ils calzers da skis. Cul temps hagian ei survegniu scursalets e pals da dar hockey. «Miu empem pal ch'jeu havevel survegniu sin Nadal ha in auter manizzau gia l'emprema ga cun siu fest coller. Quei ha dau massa larmas», seregorda Silvio Albin ch'ei staus biars onns president dall'UDS Trun, passa 20 onns responsabel per la scola da patinar e buc il davos pissiunau «Ysmeischer». El ha passantau mellis uras sila piazza da glatsch, cun ni senza scursalets. Aunc adina surpren el da sprizzar e splanar il glatsch cu ils giuivens han buca temps: «Mia finamira eis ei ussa da seretretter plaunet diltut, igl ei bi ch'ina squadra da giuivens muossa ton engaschi. Ei fan quei cun grond engaschi e pissiun. Ei drova in pèr che battan, schiglioc dess ei daditg buca pli la piazza da glatsch a Trun», manegia el cun in surrir.